

共同經課-1 以賽亞書第六十一章一節～四節，八節～十一節

1 主耶和華 ê 神臨到我；因為耶和華用油抹我，hō 我傳福音 hō sòng-hiong ê 人；差我醫好傷心 ê 人，報告受掠 ê 得 tiòh tháu 放，受關 ê 出監牢； 2 報告耶和華歡喜 ê 年，kap 咱 ê 上帝報仇 ê 日；安慰一切悲哀 ê 人； 3 tī 錫安悲哀 ê 人用花帽賞賜伊，來替火灰，歡喜 ê 油來替悲哀，o-ló ê 衫來替憂愁 ê 心，hō in 稱做公義 ê 樹，就是耶和華所栽 ê，來顯明家己 ê 榮光。 4 In beh 起造古早拋荒 ê 所在，建立早前冷靜 ê 位厝，也 beh 修理拋荒 ê 城，就是代代冷靜 ê 位處。 8 因為我耶和華愛公平，怨恨不義 ê 搶劫；我 beh 照誠實報應 in，也 beh kap in 立永遠 ê 約。 9 In ê 後裔 beh tī 列國中 hō 人 bat 伊，in ê kiáⁿ 孫 tī 眾百姓中也是 án-ni；見若看見 in ê beh 認 in，是耶和華賜福 ê 後裔。 10 我因為耶和華大大歡喜，我 ê 心神因為我 ê 上帝就快樂；因為祂用拯救做衫 kā 我穿，用公義做袍 kā 我 moa，親像新 kiáⁿ 婿戴 súi ê 帽，koh 親像新娘裝飾寶物。 11 因為土地怎樣 hō 百項 ê 五穀 puh 芽，園怎樣 hō 所種 ê 發生，主耶和華也 beh án-ni hō 公義 kap o-ló 發生 tī 萬國 ê 面前。

共同經課-2 詩篇一百二十六篇

1 耶和華 chhoā hiah ê 受掠 ê 人倒 tng 來錫安；Hit 時咱親像眠夢。 2 Hit 時咱 ê 嘴 hah-hah 笑，咱 ê 舌出大歡喜 ê 聲；外邦中就有人講，耶和華為 in 行大事。 3 耶和華有為咱行大事，咱就歡喜。 4 耶和華 ah，求你 hō 阮受掠 ê 人倒 tng，親像南方 ê 溪水 koh lāu。 5 流目屎也種子 ê Beh 出歡喜 ê 聲收割。 6 Hit ê 流目屎帶種子出去 ê，的確 beh 帶伊 ê 稻把歡歡喜喜 tò 來。

共同經課-3 帖撒羅尼迦前書五章十六節～二十四節

16 Tiòh 常常歡喜； 17 tiòh 祈禱無 soah； 18 凡事感謝，因為 chit ê 是上帝 tiàm-tī 基督耶穌 òng lín ê 旨意。 19 M̄-thang phah-hoa 聖神； 20 m̄-thang 看輕先知 ê 話， 21 凡事 tiòh 察驗； 22 好 ê tiòh 執守；tiòh 離開 tak 樣 ê pháⁿ。 23 願平安 ê 上帝家己 hō lín 一盡成聖；koh 願 lín ê 神 kap 魂以及身軀 tī 咱 ê 主耶穌基督 koh 來 ê 時，lóng 得 tiòh 保全，無 thang 嫌。 24 召 lín ê 是信實，伊也 beh 成伊。

共同經課-4 約翰福音一章六節～八節，十九節～二十八節

6 有一人 tùi 上帝差來，名叫約翰。 7 Chit ê 人來做干證，是 beh 為 tiòh 光做干證，hō 眾人對伊來信。 8 伊 m̄ 是 hit ê 光，是 beh 為 tiòh 光做干證 nā-tiāⁿ。 19 約翰 ê 干證記 tī 下底：猶太人 tùi 耶路撒冷差祭司 kap 利未人就近伊來問講，你是 chī-chhui？ 20 Hit 時約翰承認無隱瞞；伊承認講，我 m̄ 是基督。 21 Koh 問伊，這是怎樣？你是以利亞 mah？伊講，m̄ 是。你是 hit ê 先知 mah？應講，m̄ 是。 22 就 kā 伊講，你是 chī-chhui？hō 阮 thang 回覆差阮 ê。你 tiòh 講家己是怎樣？ 23 講，我就是 teh 叫 tī 曠野 ê 聲，講，修直主 ê 路，親像先知以賽亞所講 ê。 24 Hiah ê 人就是法利賽人所差 ê。 25 In koh 問伊講，你若 m̄ 是基督，亦 m̄ 是以利亞，亦 m̄ 是 hit ê 先知，怎樣行洗禮 ah？ 26 約翰應伊，講，我是用水行洗禮；有 khia tī lín 中間 ê，lín m̄-bat 伊。 27 伊就是 tè 尾我來 ê，就 tháu 伊 ê 鞋帶，我亦 boē 堪得。 28 Chiah ê 事行 tī 約旦外 ê 伯大尼，就是約翰行洗禮 ê 所在。